

Headlines

1. लेफ्टिनेंट गवर्नर मनोज सिन्हा होरें आतंकवादी गतिविधिएं च मलव्वस होने दे दोश दे चलदे द'उं सरकारी मलाज़में गी सेवा शा बर्खास्त करी दित्ता ऐ।
2. मुख्मन्त्री ओमर अब्दुल्ला होरें आखेआ ऐ जे सरकारै शैह्री इलाकें च भीड़-भाड़ घट्ट करने दे मकसद कन्नै नमीं हाउसिंग कलोनिंग गितै जिमीं दी शिनाख्त करी लैती ऐ।
3. शिक्षा मंत्री सकीना इत्तू होरें आखेआ ऐ जे सरकार जम्मू-कश्मीर च बुनियादी शिक्षा प्रणाली गी तगड़ा बनाने लेई वचनबद्ध ऐ।
4. जम्मू-कश्मीर विधानसभा ने शासन गी तगड़ा बनाने, करायेदारें ते मकान मालकें दे अधिकारें दी राक्खी, श्रमिकें दे हालात च सुधार आह्मने ते सहकारी समितिएं सरबन्धी ढांचें च सुधार आह्ले 4 महत्वपूर्ण बिलें गी पास करी दित्ता ऐ।
5. हाड़ें सरबन्धी मामले पर चर्चा दी मंग गी लेइयै बीजेपी विधायकें अज्ज विधानसभा शा वॉकआउट करी दित्ता।

<><><><><><>

LG-Employees Dismissed

उपराज्यपाल मनोज सिन्हा होरें 2 सरकारी कर्मिं गी उन्दे आतंकवादिं कन्नै कथित तौर पर सरबन्ध होने दे चलदे बरखास्त करी दित्ता ऐ। आकाशवाणी जम्मू संवाददाता दी रिपोर्ट मुजब इनें कर्मचारिं दी पंछान गुलाम हुसैन ते माजिद इकबाल डार दे तौर पर होई ऐ। एहू दवें शिक्षा मैहकमे च अध्यापक दे तौर पर सेवा देआ'रदे हे। हुसैन रियासी जिले दी माहौर तहसील दा रौहने आह्ला ऐ जिसले कि डार राजौरी जिले दे खेयोरा इलाके दा बसनीक ऐ। इनें दौनें दे बक्खरे-बक्खरे बरखास्तगी आह्ले आदेशें च लिखे दा ऐ जे उपराज्यपाल होरें सबूतें ते हालात गी पूरा ध्यानै च रखदे होई एहू आदेश दित्ते न।

<><><><><><>

CM-Housing Colonies

जम्मू-कश्मीर सरकार नै प्रधानमंत्री आवास योजना शैहरी तैह्त् केई सारे प्रोजैक्टें दी शुरूआत कीती ऐ तां जे शैहरी इलाकें च बदा'रदे रश आहली समस्या कन्नै निब्बड़ेआ जाई सकै। एहू जानकारी घरें-मकानें ते शैहरी विकास मैहकमे आसेआ विधानसभा च दित्ती गेई। एन.सी दे विधायक अली मोहम्मद सागर हुं'दे आसेआ पुच्छे गेदे इक सोआलै दे परते च सरकारै दस्सेआ जे नमी रिहायशी कालोनियां आर्थिक तौरा पर कमजोर वर्ग दे लोकें लेई न। जवाब च दस्सेआ गेआ जे आर्थिक तौर पर कमजोर वर्ग लेई 760 फ्लैट्स भलवाल जम्मू च बनाए जा'रदे न जिसले कि 304 फ्लैट्स उधमपुर च बनाए जा'रदे न।

<><><><><><>

Itoo-Orientation Prog.

शिक्षा मंत्री सकीना इत्तू होरें अज्ज श्रीनगर दे बेमीना आहले एस.सी.ई.आर.टी. च 'आया हेल्परें दे समर्थ निर्माण आहले इक सिखलाई कार्यक्रम गी संबोधित कीता। जम्मू-कश्मीर एस.सी.ई.आर.टी. आसेआ जम्मू-कश्मीर दे समाजी कार्यकर्ताएं सरबन्धी एसोसिएशन ते यूनीसेफ दे सैह्योग कन्नै कीता गेदा हा ते एहदा विशे-सार हा 'पोषण, प्यार ते परवरिश'। इस मौके उप्पर किट्टु अगगे भाशण दि'दे होई मंत्री सकीना इत्तू होरें आखेआ जे जम्मू-कश्मीर दी सरकार, युवाएं दे पोषण लेई वचनें बज्झी दी ऐ। उ'नें आखेआ जे समर्थ निर्माण आहला एहू सिखलाई कार्यक्रम, जम्मू-कश्मीर च मय्यारी शिक्षा दी नीहू गी मजबूत बनाने दी दिशा च इक महत्वपूर्ण गैहू ऐ ते एहदे नतीजे पक्का गै औने आहले समें च साफ नजरी औडन।

<><><><><><>

Reasi-Child Helpdesk

बच्चें दी राखी हिफाजत ते उन्दे कल्याण गी होर मजबूत ते बेहतर बनाने आहली भेठा इक्क गैंऽ पुट्टदे होई रियासी दियां डिप्टी कमिशनर निधि मलिक होरें रियासी बस अड्डे पर हर रोज 24 घंटे कम्म करने आहला हेल्पडेस्क कायम कीता ऐ। एहू हेल्प डेस्क मिशन वातसल्य स्कीम जिसी महिला ते बाल विकास मंत्रालय आसेआ चलाया जंदा ऐ दे तैह्त् कायम कीता गेआ ऐ। एहदा

मकसद जरूरतमंद बच्चें गी लोडचदी मदद ते सहायता उपलब्ध करोआना ऐ, खास करी ओहू बच्चे जेड़े गोआची जंदे न, लापता होई जंदे न जा फही कुसै परेशानी च हुं'दे न।

<><><><><><>

Youth-Festival

इंटर जोनल लैवल डिस्ट्रिक्ट यूथ फेस्टिवल दा सरिस्ता सरकारी डिग्री कॉलेज पुंछ च जिला युवा सेवा ते खेडू मेहकमे आसेआ आयोजित कीता जा'रदा ऐ। इंटर जोनल लैवल जिला युवा उत्सव दुरान तकरीबन 100 विद्यार्थिं हिस्सा लैता। इस कार्यक्रम दा मकसद विद्यार्थिं गी अपने हुनर दे प्रदर्शन करने दा मंच देना ते सामुदायिक भावना गी बदाना ऐ। इस प्रोग्राम दा उद्घाटन जी.डी.सी पुंछ प्रो. जस्बीर सिंह होरें कीता। ओहू इस कार्यक्रम दे मुख परौहने हे।

<><><><><><>

LA-Bills

जम्मू-कश्मीर विधानसभा ने शासन गी तगड़ा बनाने, करायेदारें ते मकान मालकें दे अधिकारें दी राक्खी, श्रमिकें दे हालात च सुधार आहनने ते सहकारी समितिं सरबन्धी ढांचें च सुधार आहले 4 महत्वपूर्ण बिलें गी अज्ज ध्वनिमत दे कन्नै पास करी दित्ता ऐ। मुखमंत्री ओमर अब्दुल्ला होरें जम्मू-कश्मीर च कराये दे नियमन सरबन्धी बिल 2025 गी सदन च पेश कीता ते पास बी करोआया। एहदे राहें हुन प्रदेश च कराये दी निगरानी सरबन्धी प्राधिकरण खडेरेया जाहग जेहड़ा करायेदारें ते मकान मालकें बशकार होने आहले विवादें गी बेल्ले सिर नबेड़ने च मदाद करग। ग्रामीण विकास ते पंचैती राज मंत्री जावेद अहमद डार होरें पंचैती राज संशोधन बिल 2025 ते सहकारिता समितिं सरबन्धी संशोधन बिल 2025 गी कामयाबी कन्नै पास करोआया जिंदे राहें भलेआं हेठली सतह उप्पर लोकतंत्र गी मजबूती थ्होग ते सहकारी समितिं दे कम्मकाज होर मते चुस्त-दुरूस्त बनड़न। उपमुखमंत्री सुरिंदर चौधरी होरें हट्टिं ते इदारें सरबन्धी बिल 2025 गी पास करोआया जेहदा मकसद श्रमिकें दे अधिकारें दी राक्खी-हिफाजत गी जकीनी बनाना ऐ।

<><><><><><>

BJP-Walkout

भारती जनता पार्टी दे विधायकें जम्मू-कश्मीर विधानसभा थमां वॉकआउट कीता। एह वॉकआउट केंद्र शासित प्रदेश च हाल च आए दे हाड़ें दे मगरा आहली स्थिति पर चर्चा करने दी मंग गी लेइए हा। बीजेपी दे विधायक प्रश्नकाल दरान खड़ोते दे रेय, जियां गै सभा दी कार्रवाई शुरू होई तां विधायकें जम्मू च हाड़ें करी प्रभावित इलाके पर अद्धा घंटा चर्चा कराने दी मंग कीती। स्पीकर अब्दुल रहीम राथर होरें मिम्बरें गी अपनी-अपनी सीट पर बैठने दी सलाह दिती पर ओह लोक अपनी थाह पर नेई बैठे ते चर्चा दी मंग करदे रेय। मगरा बीजेपी नै विधानसभा थमां वॉकआउट कीता।

<><><><><><>

Rosters

जम्मू-कश्मीर सरकारै, नवम्बर ते दिसम्बर महीने गितै अपने 5 मंत्रिणं लेई कम्मकाज ते गतिविधिणं आहली इक सूची जारी कीती ऐ। इस सूची दे मताबक, एह सब्बै मंत्री औंदी 3 नवम्बर शा लेइयै 5 दिसम्बर तगर बारी-बारी सिर श्रीनगर आहले सिविल सैक्रेटेरिएट च मजूद रवा करडन। हुकमै मूजब, मंत्री जावेद अहमद डार, सकीना इत्तू, सतीश शर्मा, सुरिंदर चौधरी ते जावेद अहमद राणा होरेंगी आखेआ गेआ ऐ जे ओह इस अवधि दे दरान श्रीनगर आहले नागरिक सविचालय च मजूद रेइयै लोकें दिणं समस्याणं दे नबेड़े जकीनी बनान। तोआई सरकारै औंदे नवम्बर महीने लेई, श्रीनगर सिविल सैक्रेटेरिएट च प्रशासनिक सचिवें दी मजूदगी बारै बी इक ब्यौरेवार सूची जारी कीती ऐ। सरकारी हुकमै मूजब, बक्ख-बक्ख मैहकमें दे सीनियर ऐहलकार, नवम्बर महीने बारी-बारी सिर, सिविल सैक्रेटेरिएट च मजूद रवा करडन।

<><><><><><>

Doda-Women Cricket

डोडा पुलस नै सिविक एक्शन प्रोग्राम तैह्त्त महिला क्रिकेट प्रतियोगिता दा आयोजन करोआया। एहदा मकसद महिलाएं गी सशक्त करना ते खेड्डें च महिलाएं दी हिस्सेदारी बदाना ऐ। इस प्रतियोगिता दा उद्घाटन एस.एस.पी डोडा संदीप मेहता होरें कीता। उनें प्रतिभागिं गी अपील कीती जे ओहू अपने हुनर दा प्रदर्शन करन। अपने हुनर गी होर निखारन ते पूरी निष्ठा ते अनुशासन कन्नै अगगे बदन। एहदे च कुल 6 टीमां हिस्सा लै'रदियां न।



ARTO-Kishtwar

किश्तवाड दे ए.आरटीओ तसलीम वानी हुं'दे आसेआ जिले च सिडक सुरक्षा बारै इक जागरूकता सत्र दा आयोजन कीता गेआ। इस पैहलकदमी दा मकसद अध्यापकें गी सिडक सुरक्षा दे महत्व बारै जानकार बनाना ऐ तांजे ओहू सिडक सुरक्षा सरबन्धी नियमें दी पालमा करने आहले जिम्मेदार नागरिक बी बनी सकन। गल्लबात आहले इस गेड दे दरान उ'नेंगी ट्रैफिक नियमें, राहगीरें दी सुरक्षा ते हेल्मैट ते सीट बेल्ट दे इस्तेमाल दे महत्व दे कन्नो-कन्नो सिडकै कंठ्ठे दुरने जां सैकल चलाने दे बारै च बी जागरूक बनाया गेआ। इस मौके उप्पर बोलदे होई ए.आरटीओ तसलीम वानी होरें अध्यापकें गी सिडक सुरक्षा दे महत्व बारै जानकार बनाने दी जरूरत पर जोर पाया ते आखेआ जे ई'आं करने कन्नै सिडक हादसों गी रोकने च बड़ी मदाद हासल होई सकदी ऐ।



Kishtwar-Seminar

किश्तवाड दे एसएसपी नरेश सिंह हुं'दे दिशा-निर्देशों पर छात्तरू आहले पुलस थाने ने राश्ट्र दी सेवा दरान सर्वोच्च बलिदान देने आहले शहीद पुलसकर्मिं दी सम्हालै च सिविक एक्शन प्रोग्राम दे तैह्त्त इक सेमीनार दा आयोजन कीता। छात्तरू आहले सरकारी हायर सैकेंडरी स्कूल च करोआए गेदे इस कार्यक्रम दा विशे सार हा - राश्ट्री सुरक्षा/इक प्रगतिशील ते इकजुट भारत दा निर्माण। इस मौके पर एसएसपी नासर अहमद, किश्तवाड दे सीईओ संजय कुमार, जैड.ई.ओ ते होर दुए आला अधिकारी बी उत्थे मजूद हे जि'नें इस विशे दे महत्व बारै अपने माहिराना बचार सांझे कीते।